



Ulloq: 30. april 2025  
Allaffik: Nordatlantkontoret  
Sulia.sul.: Simon Holmelund Lange  
Suliap normua: 2024-01933  
Takussutissiaq: 3671292

Eqqartuussisarnermik inatsimmi eqqartuussisutut imaluunniit eqqartuussissuserisutut imaluunniit pisortani unnerluussisussaataasutut il.il. atorfinitsinneqarnermi qallunaat nunaannit inatsisilerinermut tunngasumik soraarummeersimanissaq pillugu piumasaqaammut tunngatillugu Kalaallit Nunaanni Universiteti, Ilisimatusarfik, pillugu allakkat.

1. Inatsisinik ilisimatusarnermi bacheloritut- aamma inerluni soraarummeersinnaanertut ilinniagaqarsinnaaneq, Kalaallit Nunaanni Universitetip, Ilisimatusarfiup neqeroorutigigaa, Naalakkersuisut ilisimatitsissutigisimavaat.

Eqqartuussisutut ivertinneqarumalluni imaluunniit eqqartuussissuserisunngorumalluni imaluunniit dommerfuldmægtigitut, advokatfuldmægtigitut imaluunniit pisortani unnerluussisussaataasutut il.il. atorfinitsinneqarumalluni, eqqartuussisarnermik inatsimmi qallunaat nunaannit inatsisilerinermut tunngasumik angusilluni soraarummeersimanissaq pillugu piumasaqaammut paasinninnissaq pillugu erseqqissaanernik pilersitsinissaq, allakkami matumani siunertarineqarpoq.

Qallunaat eqqartuussisarnermik inatsisaanni aamma Kalaallit Nunaanni eqqartuussisarnermik inatsimmi aalajangersakkat attuumassuteqartut ima paasineqassasut, Ilisimatusarfimmit inatsisilerinermut tunngasumik soraarummeersimallutik qinnuteqartut, Danmarkimi universitetimit imaluunniit Færøernes Universitetimit inatsisilerinermut tunngasumik soraarummeersimallutik qinnuteqartut assigalugit aalajangersakkani inuussutissarsiutit pineqartut iluanni assigiinnik periarfissaqarlutik assigiinnillu atugassaqaartinneqarlutik atorfinnik qinnuteqarsinnaasut, ataani takuneqarsinnaasutut Inatsiseqarnermut ministereqarfik isumaqarpoq.

2. Eqqartuussisut, eqqartuussivinni fuldmægtigit (imaappoq dommerfuldmægtigit aamma inatsisilerituut eqqartuussivinni atorfinitsinneqartut) aamma pisortani unnerluussisussaataasut (politidirektøri minillugu) qallunaat nunaannit inatsisilerinermut tunngasumik bacheloritut- aamma inerluni soraarummeersimasutut angusillutik soraarummeersimanissaat qallunaat eqqartuussisarnermik inatsisaanni § 42, imm. 3-mi, § 52, imm. 2-mi, aamma § 105, imm. 1-imi takuneqarsinnaavoq. Taama tulleriillutik, eqqartuussissuserisut advokatfuldmægtigillu, pineqartillugit, ilinniarsimanissamut piumasaqaatit assinginik eqqartuussisarnermik inatsimmi § 119, imm. 2, nr. 3, aamma § 135, imm. 1 imaqarput. Inatsimmi § 260, imm. 6 aamma 7 malillugit, inaarutaasumik piumasaqaat taanna aamma inummut, inuup allap nammineq sinnerluni iliuuseqarnissamut pisinnaatissimasaanut atuuppoq.

Nunatsinni Eqqartuussivimmi eqqartuussisut, Nunatta Eqqartuussisuuneqarfiani eqqartuussisuunerit, Nunatsinni Eqqartuussivimmi aamma Nunatta Eqqartuussisuuneqarfiani fuldmægtigit kiisalu pisortani unnerluussisussaataasut, pinerluttulerinermik suliat eqqartuussisutigoortumik suliarineqarneranni Nunatsinni Eqqartuussivimmut aamma Nunatta Eqqartuussisuuneqarfianut ikiuutaasut, inatsisilerinermut tunngasumik inerluni soraarummeersimasutut angusillutik soraarummeersimanissaat piumasaqaataasoq, Kalaallit Nunaanni eqqartuussisarnermik inatsimmi § 13, imm. 1-imi, § 15, imm. 1-imi,

aamma § 61 i, imm. 1-imi takuneqarsinnaavoq. Kalaallit Nunaanni eqqartuussisarnermik inatsimmi § 72, ilaatigut qallunaat eqqartuussisarnermik inatsisaanni § 119, imm. 2, nr. 3-mut innersuussisoq, aamma Kalaallit Nunaanni eqqartuussisarnermik inatsimmi § 85, imm. 1 malillugu, eqqartuussissuserisutut ivertinneqarsinnaanermut imaluunniit advokatfuldmægtigitut atorfinitsinneqarsinnaanermut, pineqartup qallunaat nunaannit bacheloritut- aamma inerluni soraarummeersimasutut angusillutik soraarummeersimanissaat piumasaqaataavoq. Inummut, inuup allap nammineq sinnerluni iliuuseqarnissamut pisinnaatissimasaanut ilinniarsimanermut tunngasunik piumasaqaatinik, Kalaallit Nunaanni eqqartuussisarnermik inatsit aalajangersakkanik imaqanngilaq. Kalaallit Nunaanni eqqartuussisarnermik inatsimmi § 323 malillugu illersuisut akuerisaasut inatsisilerinermut tunngasunik inerluni soraarummeersimasutut angusillutik soraarummeersimanissaat aallaaviatigut piumasaqaataavoq.

3. Folketingstidende 2020-21, ilanngussaq A, L 212, saqqummiunneqarsimasoq, qupperneq 55 f malillugu, nunanit allanit bacheloritut- aamma inerluni soraarummeersimasutut soraarummeersimaneq, qallunaat nunaannit inatsisilerinermut tunngasunik bacheloritut- aamma inerluni soraarummeersimasutut soraarummeersimanissamut piumasaqaat naammassinavianngikkaa, qallunaat eqqartuussisarnermik inatsisaannut piareersaataasunik suliani takuneqarsinnaavoq. Kisianni, ” [...] savalimmiuni inatsisilerinermut tunngasunik bacheloritut- aamma inerluni soraarummeersimasutut soraarummeersinnaanerup takkuttussap, ilinniarneq Danmarkimi universitetimit inatsisilerinermut tunngasunik bacheloritut- aamma inerluni soraarummeersimasutut soraarummeersinnaanermut naligiissinneqarsinnaanera piumasaqaatigalugu [...], piumasaqaatinik naammassinissinnaanissaanut akornutissaqanngitsoq, tassunga uiggiullugu takuneqarsinnaavoq. Assigisaanik Kalaallit Nunaanni inatsisilerinermut tunngasunik bacheloritut soraarummeersinnaanerup takkuttussap, ilinniarneq Danmarkimi universitetimit inatsisilerinermut tunngasunik bacheloritut- aamma inerluni soraarummeersimasutut soraarummeersinnaanermut

naligiissinneqarsinnaanera piumasaqaatigalugu, piumasaqaatinik naammassinnissinnaanissaanut akornutissaqanngilaq. Ilinniagaqarsimanissamut piumasaqaammut atatillugu, oqaaseq “qallunaat” taamaalilluni naalagaaffimmut tamarmut aamma Danmarkimuinnaanngitsoq sammitinneqarpoq.

Kalaallit Nunaanni inatsisilerinermut tunngasumik bacheloritut imaluunniit inatsisilerinermut tunngasumik bacheloritut- aamma inerluni soraarummeersimasutut soraarummeersinnaaneq, Danmarkimi universitetimit inatsisilerinermut tunngasumik bacheloritut imaluunniit inatsisilerinermut tunngasumik bacheloritut- aamma inerluni soraarummeersimasutut soraarummeersinnaanermut naligiissinneqarsinnaanera, Kalaallit Nunaanni eqqartuussisarnermik inatsimmut piareersaataasumik suliani piumasaqaataanngilaq.

Savalimmiuni Færøernes Universitetimi inatsisilerinermut tunngasumik bacheloritut- aamma inerluni soraarummeersimasutut soraarummeersinnaaneq Danmarkimi inatsisilerinermut tunngasumik bacheloritut- aamma inerluni soraarummeersimasutut soraarummeersinnaanermut naligiissinneqarsimammat maluginiarneqassaaq. Eqqartuussisutut imaluunniit eqqartuussissuserisut ivertinneqarnissamut imaluunniit pisortani unnerluussisussaataasutut il.il. atorfinitsinneqarnissamut qallunaat nunaannit inatsisilerinermut tunngasumik soraarummeersimanissaq pillugu eqqartuussisarnermik inatsisip piumasaqaatai pillugit allagaq nr. 9266, 14. maj 2022-imeersoq innersuussutigineqarpoq.

4. Assersuutigalugu Inatsiseqarnermut ministereqarfik imaluunniit oqartussaasut allat, inatsisinik ilisimatusarnerit marluk naligiissinneqarnissaat pillugit pisortatigoortumik aalajangiisinnaanerat pillugu, qallunaat eqqartuussisarnermik inatsisaanni imaluunniit Kalaallit Nunaanni eqqartuussisarnermik inatsimmi imaluunniit inatsisini allani, allakkut malittarisassaqaanngilaq. Taamaattoq Ilisimatusarfimmi inatsisilerinermut tunngasumik bacheloritut- aamma inerluni soraarummeersimasutut soraarummeersinnaanermut ilinniartitaanermik aaqqiussuussinerit misissoreerlugit kiisalu

Ilisimatusarfimmik aamma universitetip inatsisinik ilisimatusarnerup pitsaassusissaa pillugu namminersortunit pisortanillu siunnersuisartuni sinniisutut ilaasortanik arlalinnik oqaloqateqarsimanini tunngavigalugit, eqqartuussisarnermik inatsimmi inuussutissarsiutitut malittarisassiuunneqartunut atatillugu ilinniakkat naligiissinneqartutut isigineqarsinnaasut, Inatsiseqarnermut ministereqarfik isumaqarpoq.

Qallunaat eqqartuussisarnermik inatsisaanni §§ 42, 52, 105, 119, 135 aamma 260 aamma Kalaallit Nunaanni eqqartuussisarnermik inatsimmi §§ 13, 15, 61 i, 72, 85 aamma 323, taakkunani ilinniagaqarnissamut piumasaqaatit pineqartillugit, Inatsiseqarnermut ministereqarfiup isumaa malillugu taamaammat ima paasineqassapput, Ilisimatusarfimmit inatsisilerinermut tunngasumik soraarummeersimallutik qinnuteqartut, Danmarkimi universitetimit imaluunniit Færøernes Universitetimit inatsisilerinermut tunngasumik soraarummeersimallutik qinnuteqartut assigalugit aalajangersakkani inuussutissarsiutit pineqartut iluanni assigiinnik periarfissaqarlutik assigiinnillu atugassaqartinneqarlutik atorfinnik qinnuteqarsinnaasut.

*Inatsiseqarnermut ministereqarfik, ulloq XX. XX 2025*

Niels Dam Dengsøe Petersen